

四庫全書

史部

欽定四庫全書

閩中理學淵源考卷七十三

廣平府知府李清馥撰

文山黃氏家世學派

吾郡隆萬間耆舊典型於時蔚起而恬澹清脩立身  
本未有進退大節則共稱文簡黃公也公之學術宗  
奉紫陽鄒氏元標謂其平生服膺蔡文莊規矩尺寸  
不踰考公立朝建沃忠言匡持君德丰采德業為世

名臣實無愧於文莊矣至退歸林下敦禮耆舊獎掖  
後生闡發潛德宗厚禮教敬讀田亭草諸製述仰見  
正學源流實有關世教之作原其家學皆本于守軒  
朴齋溯逸齋而上積功累德至公而不恢前烈其後  
嗣踵起者學使靜谷公潤中為最著茲特錄其先世  
所以肇基孝弟敦說詩書以貽厥後人者以風世焉

處士黃逸齋先生賢

黃賢字彥德號逸齋晉江人元處士天麟公其初祖也

生五齡母沒鞠于繼母孫氏天資純懿孝養逾於所生長  
即知讀書好禮維持家務勤儉治生家用是裕且樂施予  
周急里閭少年不事事者必喻以為善人多化之長子應  
登永樂二年進士次惠抱德不仕 田亭草家譜傳節錄

黃守軒先生禮

黃禮字廷文號守軒逸齋公會孫天性至孝而尤篤於  
信義鄉閭稱之少孤父墳湮沒後顙天祈神大號于隣  
墳者三日忽有龐眉老叟指示其處果得證驗相傳為



孝感焉家庭之間其教不嚴而肅嘗訓子曰惟謹厚可  
遠怨惟質實可動人其識之 田亭草家譜傳節錄

文簡黃儀庭先生鳳翔

黃鳳翔字鳴周號儀庭晚更號止菴晉江人少小即警  
敏絕人觀書沉潛經目成誦筭腹不忘稍長習胡氏春  
秋學於學博蔣與泉鳳翔習其師說本經據傳折衷以  
己意弱冠即以善春秋聞郡中時王遵巖慎中方設比  
論文誘教後進得鳳翔藝造廬訪之鳳翔以髫年攝衣

冠見不懾不迫步止從容遵巖益大奇與坐語曰生年  
少而文章氣概俱高異日者必魁天下遂致鳳翔為諸  
郎文社交辛酉鄉薦第四自是益肆力文章與臬長張  
洞齋藩伯洪心齋對壘角藝隆慶戊辰成進士殿試第  
二人明泉中及第自鳳翔始授編脩教習內書堂亡何  
以疾假里居三載還朝旋丁外艱歸萬歷丙子補故官  
與脩世宗實錄成進脩撰充經筵官五年同考會試首  
相張居正奪情起復取中旨罪諸言臣怒新進士鄒元

標特甚欲斃之杖下鳳翔昌言於朝曰此孤忠即不使  
生奈天下網常何囑門人多方調護鄒得不死頃之有  
編管諸言事章奏之役鳳翔慨然任之悉編入無隱諱  
庚辰春居正欲鳳翔再與同考使次相喻意望錄其二  
子鳳翔固辭不赴借奉使益藩避去及壬午秋以次當  
主試南畿少宰王篆亦欲如張相旨托鄉貴人為先容  
復謝不往尋遷中允累陞南京國子祭酒省母歸起補  
北監時方校刻十三經注疏鳳翔上言頃陛下去貞觀

政要進講禮經甚善但讀曾子言孝則當珍護聖躬講  
學記言學則當緝熙聖學察月令篇則當勤勵聖治繹  
世子篇則當豫建皇儲疏入上嘉納之尋擢禮部右侍  
郎兼侍讀學士會洮河告警疏言多事之秋陛下宜屏  
游宴親政事以圖安攘為今天計惟用人理財二端宋  
臣有言平居無直言敢諫之臣則臨難無敵愾致命之  
士頃吏部員外郎鄒元標直聲勁節銓司特擬召用而  
聖意頓改于前建言遷謫諸臣如潘士蒸孫如法亦擬

量移而疏皆中寢士氣日推言路日塞平居祇懷祿養  
臨難孰肯捐軀為國哉昔宋藝祖欲積練二百萬易敵  
人首太宗移上供物為用兵養士之資今戶部歲進二  
十萬初非舊額積為上供陛下富有四海奈何自營私  
蓄又竊見都城市觀金碧熒煌歲時齋醮絡繹道路經  
費資予外廷莫知與其要福於冥漠之鬼神孰若廣施  
於子遺之民命况東南財力已竭西北邊務方殷誠國  
民交病之日疏入上不能用是時儲位久虛廷臣屢請

冊立久未得命上意欲國本之定發自宸衷密諭王家  
屏以明歲舉行且無令外廷知之家屏傳語禮部鳳翔  
遂與尚書于慎行左侍郎李長春具冊立儀以請上怒  
各奪俸三月并責閣臣不密之失廷臣無敢復言鳳翔  
獨抗疏爭之不報遂乞休歸壬辰起禮部左侍郎旋改  
吏部已復陞南禮部尚書以母老辭再疏乃優詔許之  
甲午起復原官更力陳母老准以新銜在籍候用母沒  
遂不復出甲寅有旨特起而鳳翔已卒年七十有六訃

聞予恤典贈太子少保天啟初謚文簡李氏光縉曰公居官耿介自守所履清班善地未嘗為政府私人華亭興化身出其門一事之以道史館諸公以文章行誼相引重有之不能歎布腹心初抑於江陵偃蹇郎官十餘年及進宮僚淹滯留都旋歸旋起屢起屢辭則公出處之道可知矣公通籍四十七年立朝僅十三年在里居者三十餘年養晦耽寂絕無愠色布衣菲食匡坐小齋不蓄古物書畫亦無園池臺榭之觀用器無雕鏤居室

不漆堊林泉多年庭可張羅足跡罕及公門或時以時事枉直利病公言之天性孝友子孫三十餘人訓之以禮悉遵教如之學術一稟紫陽務躬行實踐不設道學之名官中秘時退食之暇惟有鍵戶讀書老而家居猶然故苞孕極富而譔著獨多嘗自言友天下士則不足尚友古人則有餘壬子春郡守陽公纂脩郡乘請公為總裁同事林省菴何匪莪蘇石水光縉亦涉筆其門公曰先輩行誼可稱不妨廣為蒐羅第勿作過情之譽則



瑕瑜自不相掩凡所進退人物公不自疏舉以公之共  
事者公但受成而已然每一傳成必經折衷或自再著  
書成人或病其太寬而直道固存矣公意在寬嚴之間  
其硜硜為公所包容多矣然有執益堅持益力者公亦  
不難虛已夫然後知公之心也鄒氏元標謂公服膺蔡  
文莊學尺寸不踰數十年出處之正不淄不磷何氏喬  
遠稱公平易忠孝狷介謹嚴為太羹元酒布帛菽粟之  
先正楷範信知言也所著有嘉靖大政記大政編年錄

田亭草等書子淳中門廕潤中顯中等俱見科目志

閩書

鏡山明名臣言行錄

新舊郡志

李衷一撰本傳 何

### 提學黃靜谷先生潤中

黃潤中字嗣雨號靜谷文簡公第六子也少穎敏崇禎十年進士初任刑部主事轉禮部員外郎旋出督學中州矢公矢慎所甄拔皆單寒竒士是時烽火相聞絃誦之聲寂然潤中多方誘掖士氣日振未幾有廣東惠潮之命欣然就道旋歸里杜門著書晚節嗜學卒時年七

十有一所註解易義杜律禹貢解諸編藏于家

田亭草家譜誌

傳錄

鴻臚史觀吾先生朝賓學派

按觀吾先生清脩直節前輩論之詳矣咫亭詹公在  
南雍時嘗稟學於先生其後與麟泉王公用汲愚菴  
郭公惟賢並以抗疏直言先後顯著游登九列為世  
名臣云

鴻臚史觀吾先生朝賓

史朝賓字應之別號觀吾少隨父商崖公宏璉讀書質  
遲重強力苦識學成為文章演漾汪洋登嘉靖二十六  
年進士第授刑部主事久之以員外郎署司篆兵部郎  
揚繼盛疏論嚴嵩納賄蠹國十大罪上怒甚杖繼盛百  
下之獄嘉靖三十二年也先是獄未下嵩子世蕃私以  
意授其黨李天榮令預囑朝賓曰必得楊甘心焉即與  
美擢朝賓正色曰有高皇帝之律在何可枉也吾寧失  
官無寧失律及議獄時司寇以下惴惴不知所出朝賓

遂擬傳奏事不實律以進部尚書何鰲謂曰更有一比  
盍思之翼日復尚書曰有之則有減於此尚書乃自比  
其律且云傳此庶得當朝賓持不可獄數日未上事益  
急尚書曰急矣雷霆不測如君所執誠是夫固為俱靡  
耳盍以待後解而侍郎王學益直曰司官徇名予老矣  
於是當以詐傳令旨罪絞自為藁授朝賓朝賓既爭不  
得請署奏末云楊繼盛語雖誑誤心實無他惟陛下憫  
其狂愚謫發遠戍庶以全好生之仁奏入繼盛竟坐大

辟尚書侍郎奪俸而朝賓降三級外調泰州判方繼盛  
下獄時薦紳相見脇息不敢語及繼盛杖瘡甚同年提  
獄禁不許關通獄之上朝賓自分重譴與繼盛俱死耳  
諸公有入獄勞問繼盛者繼盛都閉目不言及朝賓至  
瞪視曰史應之耶費心多矣朝賓當往泰州別繼盛書  
曰遇公之事當以死爭賓不死者尚冀公不死也楊復  
書曰某批奸人腸恨不即死公何苦哉公其珍重判泰  
州三年量移揚州久之遷南戶部以艱歸服闋補工部

郎分署張秋鎮通商惠民久之嵩敗徐文正階當事乃以河南僉事擢尚寶少卿尋改南大理丞旋復徙應天府丞久之轉鴻臚卿卒詔賜諭祭朝賓居常訥訥至臨大事決大利害屹然山立不移嘗稱民生利害之端非有惻怛忠誠之心不能體察吾身利害之端非有剛毅之守不能鎮定故其所至無論中外並皦然不滓卓有樹立而其最彰明較著者在不屈嚴相與部長持忠愍獄士論譴之歿之日宦橐蕭然居屋數椽不蔽風

雨所著有觀吾集及史氏內範藏於家學者稱曰觀吾

先生云

舊郡志

閩書

李衷一撰本傳

司訓洪積齋先生猷學派

按文簡史公撰洪先生周易翼義敘云余家世受易  
先君子嘗有撰次未就稍長獲遊積齋洪先生之門  
而始有會也先生束髮窮經老而逾篤至晚年而後  
論說始定又曰邇來士習好異異說曹興不獨與文  
莊紫峰二先生刺謬浸尋而操戈紫陽矣二先生書



皆已布之學宮日為異論所蝕予嘗求其書於里塾  
不得以為恨於是先生子孝廉子愚出其家藏梓之  
福安黌舍俾小子序而行之先生之說行即二先生  
之說行也先生淵源於蔡陳而宗朱子之義故云翼  
義云今錄其派繫載于篇

司訓洪積齋先生猷

洪猷字文振號積齋世家晉江錢與里猷性資強毅厚  
於彛常藩身必以禮遇事尤奮發敢任斷詞正言卓有

任道之質而學足以充之弱冠喪父奉母并撫諸弟殫厥心身家貧不支以舌耕佐費一切婚嫁咸取給焉蚤以學名從遊之士數舍而至士相遇講述鮮不名猷之學者平昔毅然能尊師重道其學則繇紫峰虛齋以上邇考亭條分理解塾師箋析之外又復推緣傳註以印合聖賢宗旨誠意諄諄顧不自立門戶直於講藝中提掇身心實際用證聖功文章絕去華飾根諸理與久之司訓江右之南安一如教閩士旨貧生脩藝每從謝却

間瞻之餽律人以恥養人以名言準履繩居一載當道  
旌為廣文冠遽疾卒門人史文簡繼偕誌其墓所著有  
易經翼義四書說約子啟哲萬歷丁酉鄉薦

纂史文簡  
撰墓志

方伯洪鏡潭先生澄源

洪澄源字子定號鏡潭富之從孫萬歷十四年進士授  
戶部主事歷郎中時資深當守郡而桂林守缺里人秉  
銓或謂可謁銓曹易一名都母桂也澄源笑不答於是  
擢守桂林在郡半年謁謝不一行廉仁著聞擢貴州按

察副使備兵畢節時宣慰安疆臣地廣兵強澄源外制  
以法內推以心疆臣畏服播酋楊應龍為變朝廷出師  
征之命疆臣出征助戰中丞郭子章委澄源監其軍安  
與楊竇相唇齒內懷觀望數張皇以撼澄源不為動疆  
臣乃進兵攻應龍於大水田大破之斬首無算應龍敗  
入海國踰月授首論功賜金帛陞貴州按察使踰年轉  
雲南左布政使未赴卒澄源平昔逡巡樂易及其受賑  
臨戎有壯夫弗克為者惟不擇利害為趨舍蓋自卻謁

銓圖大郡時預見之矣故強首阻夷莫不歸心其忠誠有以孚之也史文簡贊曰李文節公不輕許可而獨稱澄源制安平播為仁者之勇有百世之功信然哉

新郡志改

本 參史文簡撰本傳

副使許賜山先生學派

按賜山先生易學一時推重文節李公會撰墓志追述無異辭其所學所守固可信者矣

副使許賜山先生天琦

許天琦字大正食廩德化後歸晉江其先世有許稷者  
舉唐貞元進士賜告歸讀書清源山中因顏其讀書處  
曰賜恩今為賜恩巖而天琦號賜山不忘祖也嘉靖四  
十一年進士歷工科給事中贊署長疏止鰲山燈費又  
疏海防四事轉刑科給事中疏刑名弊源六事既而疏  
劾兩廣總督其人倚輿援中天琦乃出天琦廣東參議  
備兵惠州年餘擢滇副憲備金騰兵金騰多雜夷天琦  
至以化誨為務日進諸生講學羣民庶立鄉約俾相訓

迪俗稍稍變方四閱月而嬰疾卒天琦有至性又方嚴  
無所狎昵絕不為人干請其為給諫時某學子介鄉嫗  
持八百金為壽天琦叱去之平生獨喜說書講易多自  
得箋註外一時學者以為指南仕宦所至英髦秀士執  
經請業屨滿戶外所著有周易管見續宋史斷行于世  
李文節撰公墓志言每見公說書講易多發前人所未  
發其議論老誠識大體不尚沽激其操行斤斤檢押外  
不錯寸趾也既貴普陋儉約蕭然故諸生時一絹袍十

八年云 纂李文節撰墓志

蔣敬齋先生際春

蔣際春字君育別號敬齋世家於泉之福全瀕海獨以詩書絃誦著聞父赤山公好行其德開子姓以儒多彬彬者子二際春其仲也際春讀書質魯而敏悟王遵巖特奇其文嘗曰摩空白鶴非樊中物也與兄伯沂泉公稟學于賜山許先生是時賜山坐皋皮講易邑賢豪爭北面獨賞識于際春所著有四書日抄易經記註並膾



炙人口惜無年而卒子光彥孫德璟

墓李東一先生集

史氏家世學派

按黃恭肅撰史方齋墓志稱史氏先世自寧波入閩數傳至旌孝公仕傳以孝行著成化中詔旌其門方齋即仕傳公元孫與觀吾禮齋少受業伯父商崖公日講四書周易不襲時師皮膚說務根極聖賢垂訓本旨商崖事實未能詳然按其家世亦以見當時父兄之教肅而成之為多迨後大鴻臚朝賓有不可奪

大節方齋兄弟以高蹈名德稱其後嗣踵出為世名  
臣碩輔皆本于家學云

訓導史商崖先生宏璉

史宏璉別號商崖晉江縣學嘉靖間司訓金壇以子朝  
賓官贈刑部主事餘事實未詳按觀吾公朝賓方齋公  
朝宜禮齋公朝富皆少受學於商崖公其家庭牖教大  
畧詳見方齋公墓志

泉郡萬厯志

史氏雲臺稿

藩伯史方齋先生朝宜

史朝宜字直之黃恭肅撰公墓誌曰公嘗自言少受業於伯父商崖公日講四書周易不襲時師皮膚說務根極聖賢垂訓本旨翌日答而未悉必使反而更思索之復未悉者責之既悉方與續講後章自是循循孜孜愈久愈覺意味深長公讀書之法然也公既得書意味遂以身膺而服之自網常倫理之大以至謁見取受一事一物之微苟有畔於聖賢垂訓義理閒然不使少加於其身也弱冠補弟子員屢試高等士慕公者競學步其

舉子業公曰是筌蹄耳君等遜志聖賢義理意見既充  
詞自足以達之抑士君子立身天地間道德功業職分  
重矣奚區區舉業效習為也淳菴公患瘡臥牀公躬理  
藥餌時湯粥扶持起居者五餘月至目不交睫歿而哀  
且毀執喪必如禮制廬墓讀書者三年嘉靖三十二年  
登進士第授淮安山陽令山陽田土多荒而賦額廣民  
多流移當路督計嚴急催徵艱甚公以帑藏備賑饑之  
蓄遣糴於江南湖北間招賑其流移者而代輸其所逋

負益存活淮民莫可計數是時倭奴入寇趙文華視師海上獵賄郡邑比過淮公防守封疆保定居民供帳一如常禮送不出境趙恚甚既廉知為苦節吏置之旋丁母憂服闋補戶部主事是時東粵亦病倭珠厓孤懸海島守臣率以賄敗朝議遴公以行比至杜絕陋習撫安疲民崇風教以正酣淫之俗肅官箴以剔貪殘之吏其治狀為置守以來第一在郡三載即拜公廣東按察副使晉參浙藩總東粵憲東粵之民服其威信不怒而嚴

陞湖廣右布政楚為江陵相之鄉公覩江陵規局槩以  
刑名慘刻斷國家元氣不能媿阿任職未數月引疾乞  
休楚撫固留公迺自馳使持疏再疏司銓者覆請得旨  
回籍調理且云病痊之日撫按具奏起用公歸治小書  
室於陋巷仍讀書其中時與禮齋廬居雲臺先塋側以  
山林泉石為樂足跡未嘗及當道之門時閩撫楚黃州  
人也以理學相雅重或勸公時致通問可藉薦起復公  
曰則如勿止而復任且援焉非夫矣易稱不恒其德

或承之羞而欲予以羞自承乎竟無隻字往復蓋公清  
貞之節道義之守終始不易如此初淳菴公宏珂方生  
公時卜者言當為盛世高蹈名儒非徒功名富貴士也  
信不誣矣公閱歷仕路二十四年骯髒直道自號方齋  
以見志享年六十有八所著有易說及詩文子繼偕裒  
輯傳之凡十二卷弟朝富鄉會試同榜歷官永州守以  
清望著聲亦引疾歸卒年九十鄉人以比漢二疏焉

墓黃

恭肅撰墓志

郡守史瑞巖先生朝鉉

史朝鉉字貫之號瑞巖晉江人隆慶二年進士父宏詢  
歷壽沅二州知州朝鉉隨行官邸自沅歸從許賜山天  
琦受易日以所口授者輯而成書後梓行於武塘官舍  
朝鉉為人性端介潔脩澹尚初令嘉善每蒞政容止儼  
然人不敢干以私書座右曰公生明嚴生威二者為官  
歲要訣編審按戶輕重布之強家無所假貸加意作人  
授南吏科給事中盡却例儀任三載侃侃多糾繩而劾



大璫申信疏十罪南中人德之萬歷乙亥復堯大計適  
同年戶垣余懋學者疏時政四江陵憾為刺已內批予  
削籍而移收朝鉉未幾而湖州命遂下朝鉉夷然之任  
時方溽暑至則躬閱繫囚不待訊爰書而滿雪冤濫者  
十餘輩其處脂不膩一一如為令時後民思之以配前  
守黃氏樞并城隍神而三焉纂史文簡撰墓志

文簡史聯岳先生繼偕

史繼偕字世程號聯岳晉江人萬歷壬辰進士殿試第

二人授翰林院編脩率同官請冊立東宮開館講學不  
報詔使兩粵盡蠲軍興諸賦還陞侍讀轉中允未幾由  
南司業遷南少宰兼署戶禮工三部力請盤庫盜帑積  
弊改詹事疏請致仕家居一年起為吏部侍郎東閣大  
學士時神宗深居不出繼偕每會廷臣請視朝并力陳  
備兵措餉不報旋致政歸熹宗即位屢遣行人促入朝  
視事甫閱月以延綏捷加太子太保兼文淵閣大學士  
為阮大鍼所忌從中擠之引年疏十八上乃得歸卒於

家新郡志

閩中理學淵源考卷七十三

欽定四庫全書

閩中理學淵源考卷七十四

廣平府知府李清馥撰

清溪詹氏家世學派

按黃文簡先生嘗言吾郡茂族其績緒最遠文獻足  
徵者宜莫如安溪詹氏溯厥肇基之祖在後周為清  
隱公云馥嘗讀公不受王氏袍笏詩不應留氏從效  
之辟從效不許乃求監小溪場始建議創邑後遂潔

身以隱樹德保世迨後宗支繁衍至司寇咫亭先生  
以直聲清節著于明隆萬間後先名德踵起茲錄其  
家世以著吾邑文獻之始焉

同知詹邦寧先生靖

詹靖字邦寧安溪人縣令敦仁之後正統六年鄉薦景  
泰中知廣昌縣縣人有揭姓者素豪黠前令不能制靖  
至寘諸法縣境肅然廉慎之操六載彌勵後陞開州同  
知卒于官孫源曾孫仰庇

萬曆府志

舊邑志

兵備詹企齋先生源

詹源字士潔號企齋母林氏娠九月而父沒林矢志  
育孤攜居郡城使就外傳源聰穎力學弘治十八年  
成進士授戶部主事權稅河西務廉正獨持朝議以  
其有風憲體改監察御史時逆瑾用事凡拜官者必  
私謁謝源獨不往瑾誅源名益著顧以梗直為柄臣  
所忌時母方就養乃乞恩奉母還已而忌者卒擠之  
就家轉貴州按察僉事貴州直指阿柄臣意劾源不

職朝議源任未一年無不職狀竟不行尼直指奏不行乾清宮災興大工採木於貴陽川湖乃留源領其役會香爐山苗叛督將卒勦平之論功擢雲南按察副使有墨吏欲置之法御史庇之源執不可聞於朝罷其官源亦坐罷歸時年甫逾強任源既早廢杜門養母備殫色養推祖腴產讓其兄於官司訊謁里閭是非絕無所聞嘗疏清溪積水三十里溉田白葉坂山寇平白當道全活良民為俘者九十餘人其為

德於鄉類如此年七十一卒自題作墓誌謂平生  
勉企古人而卒以褊中負氣兀傲忤俗云

萬應府志黃

文簡公撰詹氏家廟記

司寇詹咫亭先生仰庇

詹仰庇字汝欽號咫亭清隱公敦仁之後副憲公源之  
子自幼有識量膽力年十二而副憲捐館未幾遊庠尋  
游南辟雍受業邑先輩鴻臚御史公朝賓學日益進嘉  
靖四十四年進士授南海令才瞻守廉於上官無所阿



承以卓異徵入為御史是為隆慶二年在臺兩月餘數  
上疏穆宗命戶部購寶石珍珠諸物責三日取辦大司  
農與諫官諍不能得仰庇疏言珍珠寶石多藏中貴家  
上供日亟則索價逾倍今南北多事財用不給軍興告  
匱將焉用此乞罷購便明年春內官監辦製烟火進奉  
元夕火藥突起所延燒內房十餘間復疏言逸欲害德  
近習僨事宜嚴懲其不恪者凜宴逸之戒杜逾奉之階  
疏入俱寢不報而是時陳皇后遷居別宮寢疾危困仰

庶聞之復疏言皇后殿下乃先帝所擇以配陛下為宗廟神人之主者也竊聞道路流言坤寧宮曠而弗居積有歲月又云瘡體抑鬱成疾陛下畧不省問萬一不諱其為聖德累不少願陛下下一聽臣言還皇后于坤寧宮時賜問慰即臣蒙譴死賢於生上覽疏心動手批曰皇后侍朕多年無子近且病移居別宮冀安適却疾耳爾不曉宮中事妄言姑不究初仰庇疏上聞者謂禍且不測及得旨中外懼傳稱主聖臣直乃今睹之然為仰庇

慮者謂公今且休矣批逆鱗而嬰嵎虎不可為常仰庇  
奮不顧也會奉命巡視監局庫藏復疏言內官監錢糧  
動以供御為名肆行侵冒乞命戶工二部及巡視科道  
等官查覈以杜奸欺其該監所開工作諸費如鼇山花  
欄金櫃玉盆之類皆作無益以害有益伏願慎儉德屏  
玩好近侍諸臣或以織造采辦逢迎者悉屏斥之以彰  
聖斷疏入上震怒責其悖逆狂妄杖之百黜為民仰庇  
官臺中八閱月耳而四上疏疏多指斥中貴人其被杖

為中貴人所齟齬也神宗登極起廣東參議蓋是時江陵張居正與大璫表裏故特從外轉云抵任閱月乞疾歸徜徉林壑十有三年逮江陵卒大璫保遂同邑郭中丞惟賢徵用遂疏薦仰庇於是復起家江西參議旋轉山東按察副使南京太僕少卿晉左僉都御史諸所振刷論建如申飭御史出巡事宜擬定章奏體式為蔡文莊請諡侃侃縷縷心地磊落其持論以正綱紀崇體統為重時論翕然歸之遷刑部右侍郎甫數月引疾乞休

連六疏乃得請家居寡接惟與二三同志譚古道今布  
衣筍輿留連溪山間如曩興至必有賦咏甘超脫工鍊  
瀟然物外之思行部使者郡國守相旌旄相屬不獲一  
望見顏色顧時時伺其言論為時政因革間閭脈脈蒙  
覆露居鄉恂恂而訓子弟戢童僕尤為嚴飭廳事設二  
屏大書君子之道四及博學審問二節常在左右以  
自省歸里二十餘年而卒年七十一賜祭葬贈刑部  
尚書黃文簡言公立朝謬百折不回居鄉使人有

所慕而為善有所畏而不敢為不義友人潘洙言使  
公立朝有虎豹在山之勢何鏡山言公俊偉光明豪  
傑之作用繩檢律操聖賢之家法焉

舊郡志

閩書  
黃文簡公撰

### 東街郭氏家世學派

余讀朱簡齋先生撰郭氏譜序述其初祖於宋建炎  
間為安撫節度使數傳至伯臺公授閩省鹽運使意  
家於閩在此時歟居賢先生為伯臺之孫莅官以忠

孝聞厥後玄孫楠以直節顯族孫文煥又以學行聞  
迨弘正間有所謂岱峰冠峰伯仲者與陳南樓為友  
岱峰疑即郭氏立彥至恭定先生特起巋然未知與  
白峰族系如何然據咏賢水詩有宗寶者中稱賢水  
先生為伯稱符甲先生為祖再考符甲先生讀書恭  
定祠則諸公皆同族無疑矣末造二公以忠烈並時  
而著尤志乘所希覲云

教諭郭先生居賢

郭居賢晉江人弱冠知名博學有奇節洪武二十年  
鄉薦授臨武教諭念不得迎養父母不攜挈之官日  
夜思慕泣下形諸聲詩無非忠孝懇惻之詞有淦川  
遺稿弟宙精於楷書選翰林院庶吉士有時名玄孫

楠  
閩書

御史郭世重先生楠

郭楠字世重晉江人講易蔡文莊之門正德九年進士  
授浦江令有廉幹聲徵入為監察御史世宗即位請召



還直臣舒芬王思黃鞏張行瑞等從之嘉靖元年奉命  
稽覈兩廣倉帑參劾藩司方面無所回撓尋上章請退  
朝之暇延見大臣如祖宗故事且言主事陳嘉言忤中  
官不宜逮繫上怒奪其俸復巡按雲南時議大禮起大  
小臣多被杖謫戍杖有死者楠感痛不勝自恨不得與  
跪門之列上疏曰陛下入繼大統以孝宗為所後之親  
自張璁倡為異議桂萼席書方獻夫輩和之羣臣伏闕  
呼號忠情迫切而置死問罪璁等排正議竊美官上激

九重雷霆之威下貽舉朝縉紳之禍所議之禮未足慰  
二帝在天之靈而號痛之聲已徹九廟之內臣愚不意  
聖明之世屢見以忠諫而獲罪也乞復學士豐熙等官  
優卹死諫之臣庶以收納人心全君臣之義疏入上大  
怒遣逮繫赴京廷杖下詔獄削籍為民六年春以天變  
脩省從吏部議量與一官起吉水教諭尋陞崑山知縣  
再遷至南寧守遂乞歸家居十有八年構祠堂作家規  
年譜遺示子孫以壽終族子文煥

明史 舊郡志  
新郡志 通志

闕書

訓導郭實峯先生文煥

郭文煥字仲實號實峰以貢授高安訓導卒於官文煥  
自少究心理學四書易經太極圖通書正蒙俱有註釋  
間或發蔡文莊所未發讀史別出論斷四書學庸口義  
成於林次崖存疑未出之前議論多有脗合者所著有  
課程切問漳人蔡鶴峰列聘居西塾刻而傳之僉事項  
甌東喬稱閩中士子才敏學克不為不多獨泉士郭某

是非不謬於聖人而王遵岩讀其文喜曰義理純明經學精到不惟進於理而兼於文讀之忘食至於家人報

食數四不覺也

按先生族父楠與蔡鶴峰皆文莊高弟先生為蔡鶴峰家塾弟子師今擬附私

淑之列云

### 文學郭以相先生元愷

郭元愷字以相實峰公文煥之孫父士登以詩經名於時元愷繼其業弱冠讀書郡城東之靈丘山舍時鄉先輩參議尤烈棄官歸隱書齋相近元愷不一往見尤公

請問之賞識其文延致與其季子相切磨又與何廷評  
喬遷交友元愷治詩益有聲弟子執業屢滿從延建及  
楚粵來者彌衆館舍至不能容元愷孝友篤至勵志  
問學為人不苟然諾七上棘闈竟不得舉僻嗜書史  
積箱數十家徒四壁不以為憂其為人如此

何鏡山先生撰

本傳

恭定郭愚菴先生惟賢

郭惟賢字哲卿號愚菴晉江人萬曆二年進士令清江

以治行擢為南御史例應掣鹽所得贖銀不貸惟賢疏  
言戶部職錢穀御史職糾察各有司存請令主事掣鹽  
御史按季監督許之由是廉名益著時江陵相已死言  
事得罪諸臣多未復皇子生下恩詔惟賢言恩詔雖下  
而建言諸臣如吳中行趙用賢艾穆沈思孝鄒元標傅  
應楨朱鴻謨余懋學等尚在戍籍乞行赦宥是時巨璫  
馮保猶用事疏入謫江山丞逾月保敗召復原官劾左  
都御史陳爝希權臣指論罷御史趙耀趙應元不可總

憲紀灼罷去又薦海內耆碩之士如王錫爵孫鏞孫丕揚耿定向曾同亨蔡國珍詹仰庇等皆後先起用輿論快之主事董基以諫止內操被謫惟賢疏救甚力上怒調南大理評事遷戶部主事陞吏部稽勲郎中改考功值大計上書宰相李世達都御史海瑞二公請絕請托斥巨奸屏私暱計成中外咸服改尚寶丞晉通政司參議轉應天府丞旋改順天攝府尹篆數月中貴干請一切拒絕南北臺省交薦可大用以右僉都御史巡撫湖

廣至則請定三楚賦役全書以革加派之弊發泰和山  
香稅以補宗祿兵餉之缺分三衛輪戍武崗并請罷諸  
衛遠戍柳州以卹疲軍禁苗寨贖擄人口以遏異類楚  
故有景藩者肅宗愛子也予賦異等諸王景絕國除賦  
額仍在時潞王之國上悉以景賦予潞潞必欲得舊額  
以聞上鑄司道府縣官俸責巡撫報聞甚急惟賢酌定  
賦額請令有司徵送潞府王無得遣人來徵以致騷擾  
會楚災復疏減潞賦額築黃梅通城二城以固桑土又



請祀周元公父於啟聖祠刻元公二程文為三儒集屈大夫諸葛武侯岳武穆文為三忠集以風示楚人召入為左僉都御史言行取不宜久傳言官不宜久繫臺官不宜久缺已復言天下多故乃自大僚至監司率有缺不補政日廢弛且建言獲譴者不下百餘人劾忠者皆永棄上不納尋遷左副都御史請早建皇儲慎簡輔弼亟行考選盡下推舉諸疏俱不報自戊戌己亥兩預計典佐臺長佑善黜奸無所嫌避如南考功時以丁內艱

歸服除起為戶部左侍郎未上卒贈左都御史天啟初  
謚恭定惟賢樸誠直諫朗豁精密其念繫乎天下國家  
之大而最注意者人才用舍之間其神周於器物服用  
之微而最慎守者辭受取與之際服官三十餘載官輟  
所至綱挈目張風清弊絕世局常遷自守獨定海內士  
大夫無所間然惟賢本師事大學士李公廷機其淵源  
如此子夢詹以蔭仕戶部郎中

明史 舊郡志 新郡  
志 閩書 葉文忠撰

墓志

郭介菴先生符甲

郭符甲字輔伯號介菴晉江人誕母家謝氏山莊靈鷲山下山挺衆峯特立公生而嚴正不阿有嶽峙偉概自幼至壯雖接談宴集竟日夜端坐兀然未嘗箕倚少聰穎過目成誦凡天文地理星數醫卜律劍琴棋畫篆書刻騎射之藝皆諳習精通五經子史垂髫即淹貫八歲成舉子業研精于易著有墨訣易訣大小題筆要八法行于世天啟癸亥年十九為學使周日臺公拔儒士第

一甲子年二十登賢書甫郡司李祁世培公分校所得  
士乙丑下第歸讀書恭定公祠以自勵戊辰下第後教  
讀給日用且供菽水歷漳潮平和饒平及齊魯豐沛諸  
郡邑足跡不肯一踵公門惟與生徒講論或娛詩酒窮  
山水搜勝探竒其在平和也有僧求公序文作衣鉢計  
遇盜欲殺之搜見其文大竒之曰此郭大人筆也清操  
君子汝獲與遊耶釋之僧袖文來謝曰活我者此也因  
乞題簡末云齋地在太蓬山頂公深夜讀書虎常來窗

外伏聽每有咆哮超躍聲徹於內公著虎聽草紀之其在饒平也邑人黃姓者求公書扁及門對懸掛後其家失火盡燼惟扁對巋然僅存人皆異之饒令邱金聲公同里同年友也居是邑三年不通一刺謀一面邱甚怪之一日徒步造訪公閉齋門不納只隔扉問答邱曰郭年兄何見拒之深也公曰爾治爾政吾讀吾書公私互無干涉決於爾治內終不親覲也其狷介類如此其在豐沛也以地近聖賢風多淳古公意欲挈家卜居於此

乃積館俸買闕家園地百六十畝并構茅屋一所  
嗣而值滄桑之變所志乃不果公二十年青袍六  
上春官崇禎癸未年三十九宮僚春坊周巢軒公  
同校禮闈得公卷大加器賞曰此正氣文字必真  
人品也亟薦之以謄硃魚魯待校改乃定不置前  
茅殿試二甲假歸里甲申賊闖犯都門聞三月十  
九之變恨不與難公為孝廉時贈資德大夫辱菴  
公與贈太夫人謝母布衣蔬食怡然曰不可以吾

兩人易兒純操公之卓行亦二尊人之遺也

沈公  
佺期

撰傳畧

郭賢水先生承汾

郭承汾溫陵陳氏寶鑰紀畧曰公字懋袞別號賢水晉江人登崇禎癸未進士初授淮安府推官涖任八閱月以才能徵為浙江道監察御史公家城東十里之杏宅鄉族丁以千計性好任俠郡有不平事不憚攘臂為之凡有紛難者必排解之故人

多以郭解稱焉豪族多目憚之公不顧也然此少年事耳其臨大事百折不回始信昔日之好俠者皆所云配義與道溢于胸臆而不自禁焉爾

陳綠崖先

生寶鑰撰紀畧

### 潯江何氏家世學派

顧按何氏譜牒自元末分派一郡城一潯漢一漳江其家潯漢者自小洛先生曾大父始初住邑之鳳嶼後移潯漢故為潯江何氏先生少從父塋所公雄稟



學未嘗就外傳稍長受業於孫東溪從兄孝廉洛江  
二公並名士俱器重先生而張淨峰先生嘗造精廬  
試其文藝特異之故先生之學自少小已見知於大  
賢之門淵源固已遠矣考嘉靖間先生退休閭里為  
時典型而整率家規惇正典禮文節李公曾為先生  
延請課子心特欽慕之見諸墓銘可考厥後蘇紫溪  
李東一諸公為行狀為墓表推重無異詞溯其根源  
孝友篤厚傳之數世英碩輩出至季祚中理先生變

殉流賊之難其死事與江門並烈蓋一門忠孝尤足  
風世也今謹緝其事畧著于篇

副使何小洛先生元述

何元述字元孝別號小洛晉江人自幼從父學年稍長  
受業於孫東溪某從兄孝廉何洛江某二公并名士俱  
器之一日張淨峰先生見元述於洛江精舍試其文大  
奇之語洛江曰君家有千里駒矣時年十三歲嘉靖四  
年學使者邵公試立志論元述分晰道德富貴功名之

義而原本於寧靜澹泊學使者異之十一年舉進士疏  
乞教授惠州以便迎養甲午分校浙闈得陳善茅坤潘  
季馴諸公皆為浙中聞人擢國子博士歷監丞擢南戶  
部主事出為廣東僉事遷湖廣叅議時世宗脩顯陵以  
分任勞賜金幣中貴人使楚諸大吏折節為恭元述獨  
行敵禮鎮守廖斌者傾御史包節被逮謫戍其部曲席  
勢驕恣元述即捕治之如法斌無以中陞廣東按察副  
使沿海道事積案累千株連數千百人請撫按檢閱可

問問之久遠不可問者請決除之於是宿牘一清御史  
行部不至瓊皆推臬僚代人憚浮海莫應者元述獨請  
往還抵化州次白沙驛遇黎寇猝至持刃擬已知為河  
海道相率羅拜而去獨以慙直執法繩兩勢家責其豪  
子弟後為所擠罷歸元述孝友甚至官俸之餘敬上二  
親悉均諸弟自無厚殖性寬洪坦直無城府不知人間  
有機械知亦不較拯人於難如疴在身聞有善事喜動  
矚宇見有過失咨嗟竟日其自奉淡約脫粟而食入里

門必下車縉紳士類倒屣出迎雖下隸必衣冠乃見林  
居四十餘年正家規廣祠宇脩祖墳至耆年遇歲時禮  
節拜揖酬酢不衰卒年九十子居魯舉人官至承天知

府

李文節撰墓志

李東一撰行狀

新舊郡志

闕

### 孝廉何次洛先生元選

何元選字元學別號次洛晉江人少穎敏十歲家庭授  
章句經書傳註寓目成誦十三逸齋公捐館哀毀執喪  
如成人十九補弟子員弱冠游何柞菴公之門柞菴目

為奇士每日講口授畢退即筆記閱再歲手錄疏解累  
十二卷築精舍於東湖臨江引曹偶互相切磋旋卒業  
成均嘉靖甲子舉順天鄉薦元選為人倜儻英邁習於  
昭代典故沉毅有大畧善赴人厄寔友沒子少孤家貧  
延歸解衣授粢給食館之其人竟以儒顯平生慕義多  
如此他如議設祭田營祀屋建鄉塾召子姓弟姪耕者  
受器讀者受書家歸三年漸施有政而嗜學日篤隆慶  
丁卯束裝且北上旋卒李衷一先生撰述事狀謂公世

所稱豪舉士哉及跡其行事則恂恂儒者仁心為質引  
義慷慨百里頌功千里頌名內外無間是為難耳

李東一先

生撰行狀

忠壯何中理先生變

何變字中理晉江人萬厯乙卯舉人任靈川桂東令陞  
亳州知州崇禎中流寇土賊交訐饑癘洊至百姓十僅  
存一變儲備賑饑全活甚衆甫三日而齊寇豫寇復東  
西至變統兵力戰於盧家廟民爭致死擒賊首李忠常

顯吾殺之剗其腸以示衆賊潰隨招撫李龍房應魁等  
萬餘衆河西平未幾闖賊轉熾陷名城數十變堅守孤  
城擐甲胄晝夜不懈賊逼城下雲梯蟻集城陷被執甘  
言餌降變強立不屈大罵曰吾頭可斷不可辱也賊斷  
其足罵益疾復剗其胸旋罵旋割賊衆有泣下者嘆曰  
好烈漢磔死懸其首於市三日耳鼻皆動賊相顧驚愕

武榮洪氏家世學派

按黃文簡公撰洪易齋公墓志云武榮洪氏其子弟



多才其父兄峻督而勤勗之若穠蓂之俟豐年以故  
人材踵起閩閩稱崇今錄其先世所以肇端後嗣者  
載於篇首云

侍御洪德馨先生庭桂

洪庭桂字德馨登嘉靖十七年進士授行人奉節盱江  
以清介不緇著聞擢御史權貴勲戚為之避驄會當事  
者銜臺中抗疏激切因御史失儀槩罰遂出為江西按  
察司知事旋擢德興令復以越次驟遷論罷歸里恬澹

清脩杜門謝客監司守令絕不通謁有以寺祖山蕩言者桂笑而謝之曰吾自有良田可遺子孫也洪族科第

著武榮桂為開端云

南安邑志

布政洪心齋先生有復

洪有復字懋純初銓武陵知縣時江陵秉國楚人席氣  
縱多以意作使縣官暴橫邑里有復三尺裁之席氣  
者議徒有復他去會相敗反以得聲擢工科給事中中  
貴人殺人不法有復疏論抵罪中貴人走匿至偕其黨

環上泣也有旨屬刑部有復再疏論竟抵罪歷禮科左  
給事中進士武進人薛敷教疏論大中丞不法詞連冢  
宰部院頷之授有復意彈薛有復曰吾有去耳因自求  
外轉亡何補廣東按察副使備兵肇慶擢羅定叅政時  
州邑初建所撫犛獠與諸民分籍而處恃衆喜亂有復  
布以威德久之皆請隸民籍粵西岑溪犛叛攻城屠士  
卒有復從總督陳璘授便宜部署東三道進勦入山大  
破之上功賜錕陞俸遷浙江按察使湖廣右布政使尋

轉左礦稅不逞湘澤震動同官馮應京觸稅璫被逮繫  
有復悉力調停為民請命上為易中使以礦稅屬郡邑  
吏而更置巡撫有復有勞焉卒于官族弟有助字懋遜  
授南安府推官高潔明敏嘗攝大庾南康二邑清洗宿  
弊入為工部郎尋守廣州以艱歸服除補徽州治徽三  
年口碑載道遷廣東副使方有徽州卓異之旌而有助  
卒矣有助篤倫常厚故人當官克持節而遇親舊不失  
恩意物論歸焉

布政洪爾介先生啟睿

洪啟睿字爾介別號訥原萬厯二十年進士授禮部主事職典屬國首發沈惟敬之奸疏大司馬石星主和誤國宋應昌等扶同欺蔽復上冊立東宮救于孔謙陳泰來顧允成等二封事署儀制郎大璫以封爵為請睿不許璫銜之及璫負罪始擢祠祭郎視兩浙學政轉金衢叅政陞按察使治兵海上功績最著四明人建祠祀之轉右布政攝符入覲凡浙吏中蜚語者抗力昭雪所全

善類甚多尋轉左屬浙東饑浙西澇瘠力請蠲賑咸  
報可庚戌計典竣事遂決意乞休歸作還山十誓誠子  
弟禁僕隸約里戚奉法惟謹郡邑歲時罕所謁見惟窮  
交數人時相過從而已又常以義急人之困家食淡約  
特以棖楠祭器盡孝思追養為第一義事兄如事父友  
愛性植晚而彌篤壽六十一終子承紱孫士宏俱鄉薦  
南安邑志

部郎洪爾還先生啟初

洪啟初字爾還庭秀之孫先世由南安徙居晉江萬曆四十一年進士授戶部主事出榷泝墅關故有北關兩稅商困莫支即疏請罷諸商懼躍舟蔽江下羨金至萬餘悉籍上之典試雲南適貢金騷擾啟初疏陳其害遂得免著為令遷兵部郎丁內艱歸不出與友人蘇庚新相切劘著書以終焉

雍正間志

閩中理學淵源考卷七十四

欽定四庫全書

閩中理學淵源考卷七十五

廣平府知府李清馥撰

學博何忤菴先生家世學派

按鏡山先生著我私志志私族也何氏譜系志述基  
公之孫至元末兄弟以軍役他移始分派一郡城一  
潯漢一漳江我私志錄自五世祖諱安字叔恭始叔  
恭先生領洪武丙子鄉薦授開建江山二縣儒學教



諭通毛詩春秋二經數傳至柞菴先生專精學易兼  
治宋儒書遂開大理司徒一派蔚為儒林楷模其家  
學源本固遠有端緒矣文簡黃公嘗曰柞菴先生於  
先中允公為僚壻先公嘗謂小子某曰何先生後學  
師表也爾宜以師道事之然則柞菴當日為吾郡師  
資典憲載之名賢碩彥集中可考也至其敦詩說禮  
一門父兄子姪自相師友鼎革後培所忠實諸公歸  
隱終老其飭躬範家典型猶在至今述舊德者稱家

學未艾云茲錄其畧載於編

學博何忞菴先生炯

何炯字思默號忞菴晉江人專精易學治宋儒書有名諸生裒然為後輩師表士從游者以數百人嘉靖中應貢試內廷世宗親擢第一授安福訓導立教必本忠孝擇周程張朱遺言之切於讀書者刻之學舍以教生徒從其邑先生鄒文莊守並講德論業舉祀鄉賢申獎節孝事皆闡實德雖貴勢不少徇所賞識士如傅應楨劉

臺皆以氣節顯遷靖江教諭其教一如安邑士莫不仰其方嚴樸直以古君子尊之嘗於學齋召諸生月試之靖僻邑諸生為時義外史傳滕如炯試目必先論策後經義以進其才識邑士遂有達者性至孝早孤念祿不逮養孺慕不替哀白脩家譜以識先德嚴寢堂以肅先祀編次泉郡先哲之文章為清源文獻哀王忠文真文忠二公守泉之文章政教為溫陵留墨二書並刻於郡齋莊氏履豐撰文集序稱其所傳著大指在實學實行

以究乎尋常之極故其為文體物切理意鑄性鎔澹  
然而文黯然而質蒼然而老於骨卓然而高深於裁  
蓋絕不為浮異說瑰之辭所謂孝弟之言藹如仁義  
之言粹如也子喬遷喬遠別見學派

舊郡志

我私  
莊氏撰文

集序

大理何齊孝先生喬遷

孫運亮附

何喬遷字齊孝晉江人與弟司徒喬遠世其尊人廣  
文公炯學同習戴氏經初治博士言有聲最後攻古

文辭俊潔典亮矩矱歐曾萬厯丙子舉鄉試第四人  
授建陽縣教諭却贄給貧以宗朱扁其堂刻潭陽文  
獻於學齋中擢國子學正大司成委校二十一史進  
大理寺評事讞獄多所平反卒於京師所著有廷尉  
集孫運亮字忠寅崇禎癸未進士授廣東海康縣知  
縣甲申後與林下諸先達共結詩社環堵蕭然嘗稱  
述先訓以為家規云著有草間集咏史癸甲草諸編

舊郡志

新郡志

何氏家譜

庶常何培所先生九雲

何九雲字舅悌號培所鏡山仲子也萬厯壬子舉于鄉天啟辛酉鏡山起用少卿九雲侍京師同里相國蔣八公黃石齋黃東崖太史莊羹若鄭大白銓部林素菴皆為文章性命之交東崖復特薦于朝丁丑下第授漳平教諭端嚴率士捐俸構布衣陳先生祠又築講堂於東山寺側每釋奠先期親視捐俸修文廟刻宋名臣言行錄舉先朝未祀鄉賢中允景公暘以下

十人癸未登進士第授庶常讀中秘書不決旬而際國難誓死以父未葬自賊營逃遁南歸歸後扁其軒曰東湖間史與二三遺老結社山中順治己丑年卒年六十九雲嗜好經籍癸丑北返過維揚鹹使者為鏡山門徒馳書相問淮南商欲資緣納賄九雲叱之曰柰何以不肖之行辱我故人閣部曾二雲叅藩泉州聞九雲名造庭下交九雲不受刺不庭謁既成進士或謂公宜見政府早為地九雲曰某平生不敢喪其

所守其出處大節類此所著有荷野集

新郡志  
平邑志

漳  
何

氏家譜

戶部翁海門先生堯英

翁堯英字熙采號海門晉江人少警穎博學強記善屬  
文嘉靖十九年鄉薦六上春官謁選得懷集平粵賊三  
載報考功召為太僕寺丞歷戶部員外郎旋歸杜門謝  
客捐餘俸構祠堂祭器讀書於諸史百家靡所不窺顧  
獨潛心易傳太極諸書所著有易傳節解太極圖說教



民歌詩文論藁諸篇藏于家卒之十餘年登懷集循吏  
邑志又數年祠名宦又數年祠鄉賢采公評也堯英為  
何忤菴高弟清源文獻載其贈張月洲天衢之洛容序  
略曰余友月洲張先生分教西粵之洛容人咸謂遠且  
陋非所以處先生先生怡然喜以為吾舊遊之地也居  
易俟命志之所至即至矣無所謂險易遠邇也世稱豪  
傑之士翔奮君子之林者可多數哉然或涉據道顯或  
投置冷落或騰茂初年或收功末路其途不同其趨一

也士所遇亦何常之有余觀漢興重文學爾雅博士  
學官著之功令維時言詩無如魯申公者年九十餘  
矣其徒王臧趙綰等力薦於朝當是時安車駟馬弟  
子傳從天子為親問治亂之事力行一言何其壯也  
今先生詩學為世名家年未逮申公而志不讓焉何  
有途之險易遠邇哉先生行矣申公退居謝賓客弟  
子自遠方受業至者猶以千餘人先生方銜天子新  
命涉萬里以教出平生之素變一方之士夙莫橫經

口傳心授隨材培植之又以其餘大肆力文章俾與  
柳柳州頡頏上下皆先生夙志亦餘事也聖天子壽  
考作人嘉惠文學重儒術制作以崇化本庸知不有  
嘗受先生詩如臧綰輩者言之于朝安車蒲輪以迎  
令濟濟多士乘軺傳從者相踵耶夫老驥垂耳於林  
垌人將以外閑下乘視之然壯心猶在一試之羊腸  
太行顧盼千里先生勲業母類是乎於是先生躍然  
曰詩云周道如砥其直如矢又云人之好我示我周

行吾與子相從筆研之好有年矣切磋之功吾何以報子也請敬服斯言

楊文恪撰墓志

清源文獻

少卿李存孝先生纘

李纘字存孝晉江人受經何忤菴之門嘉靖二十九年進士授戶部主事丁艱服除補禮部遷祠祭司郎中迂直不善彌縫為嚴嵩所擠出為景府長史景王初之國從官中貴人勢張甚所至魚肉小民纘請王以法繩之橫者乃戢未幾王薨召為鴻臚少卿禮儀

肅嚴清節益振尋罷歸 新郡志 何鏡山撰墓志

通判沈震卿先生維龍

沈維龍字震卿號宗西晉江人嘉靖三十七年鄉薦  
維龍少孤事母獨至又上奉其祖母其喪父時年方  
十三侍父病隨醫調藥至廢寢食父歿哀毀如成人  
至宗中立祠立田脩墳脩譜無不獨任事叔友弟敦  
族睦宗尤謹始仕廣之翁源革除奸蠹雅重儒術置  
學田贍士一日單騎入賊壘下賊千衆而生擒其譎

苜梁忠既平餘黨聽撫歷蕪湖縣去供應節省民力  
興學教士視翁源有加旬月承重祖母憂服除補浙  
之慶元居五年遷惠州通判旋拂衣歸養杜門讀書  
數武之田不展十畝之桑常間與人言下氣怡辭而  
一歸於孝弟忠信之行嘗自銘以示子孫曰予幼而  
壯壯而老有所勉有所戒有所教皆臨深履薄之意  
云 何鏡山先生撰本傳

王先生應篤

王應篤南安人承箕子為諸生受業於何忤菴先生其歿也忤菴嘆曰是予之高弟也走唁承箕承箕有十子應篤其三獨以孝稱問所以孝則凡承箕志與事咸體而為之承箕任凡門內賓祭諸政一以委焉嘉靖之季邑中寇賊輒發人塚應篤募死士與寇為出入發大父柩窆扶之歸得無恙倡脩祖祠為族人先事繼母母急伯兄邁疾奉湯藥卧起與俱宗族不能婚喪者皆助以舉他如扶人困阨不遺餘力云

何鏡

山先生撰王孝子傳

司徒何鏡山先生喬遠學派

余嘗讀鏡山公文集載王未齋傳而知忤菴先生與公為一時典型師表維挽狂瀾之砥柱也公生於萬厯之代至崇禎初年捐館維時士風譚說異矣公之言曰當嘉靖之時晉江有慕松莊先生講易松莊之壘弟子雲從而吾先子忤菴與之相亞當是時王文成之學方新學士大夫多議其簡徑



而閩中諸先正去考亭尤近尊守其致知力行之  
說以合於聖門博文約禮之義不敢一毫離於繩  
尺其為功甚勤而其踐履甚實及乎今日而始講性  
命以為高扣玄虛以為歸求之躬行實踐之際茫  
然背馳不見其影響而去諸先正之學遠矣嗚呼  
公之言如此其為世道慮也不亦深切著明哉即  
此見公之篤信師說遵主朱學淵源相紹確乎不  
移後之論公者亦莫過於公所自述者矣公著作

宏富如山藏閱書包羅涵蓄列代英賢言行昭  
然可考即公之志事亦具見於是矣嘗論學曰主  
靜莫如居敬致虛莫若明理此尤救明季末派之  
弊林氏素菴曰泉自紫陽教鐸以後學脈薪傳蔡  
文莊陳紫峰何鏡山家省菴相繼互有發明諒哉  
再公門人林氏如源撰公遺事曰司徒佳話記云  
如源侍公于鏡山嘗取名山藏翻閱公曰此藁猶  
未定吾每喜閱者刪改按此乃公暮年之語詳於

佳話中閩書亦暮年之作疑亦未為定本今併及  
之又按先生門徒莫得盡詳有從衷一而從先生  
者俱不重載今據集中所見及校刻公集諸姓氏  
錄其著者載于篇

司徒何鏡山先生喬遠

何喬遠字穉孝號匪莪學者稱為鏡山先生父柞菴公  
炯潛脩篤學為靖江教諭子四季即喬遠稍長讀書過  
目成誦厭塾師句讀贈公獨教之年十四五即攻古文

詞有志聖賢之學未肯俛首舉子業以希急售年十九  
與兄大理喬遷同領鄉書時與楊文恪道賓莊戶部履  
明李左相夢麟山人黃克晦結社稱五子萬厯十四年  
成進士除刑部主事歷儀制司郎中時光宗為皇第一  
子十二齡未冊立神宗傳諭禮部將三皇子并封以待  
將來有嫡立嫡無嫡立長喬遠上疏以祖訓無待嫡之  
條請行冊立於是并封議寢考功郎趙南星被斥陳泰  
來顧允成等俱論救鐫秩喬遠抗疏極言之倭攻朝鮮

急大司馬石星閭儒至為請封貢喬遠疏言其以和欺  
主因進累朝馭倭故事力阻之而星堅持已說疏竟不  
行坐累謫廣西布政司經歷以事假歸思北山先墓在  
焉且為贈公手植荔園遂之鏡石結土椽世傳鏡山是  
也里居二十年中外交薦不起光宗即位即召為光祿  
少卿喬遠以為大行而得遷非臣子所忍言九月光宗  
崩熹宗即位葉文忠鄒忠介二公先後以書道出處之  
義天啟元年始赴闕移太僕王化貞駐兵廣寧主戰喬

遠畫守禦策力言不宜輕舉無何廣寧竟棄經撫繼逃  
合疏請并逮治時傳為五少卿疏初喬遠與鄒元標馮  
從吾皆於林居考德為事而汪應蛟楊東明高攀龍曹  
于汴一時同志并起廢籍因城南建首善書院科臣朱  
童蒙劾之喬遠言書院上標文實出臣手義當并罷再  
疏不允仍用為光祿卿上薦舉疏舉同縣李光縉永春  
李開芳同安黃文照海澄丁玉明龍溪張燮及華亭陳  
繼儒有旨議覆蓋薦舉久已不行喬遠復倡發之會舊

病作方志乞歸旋有銀臺之命言者謂其因病得陞喬  
遠聞之即日出國門方上辭疏熹宗以喬遠舊學清脩  
起用未久不許再堅辭疏凡五上乃晉戶部右侍郎以  
歸入里門即便道鏡山作客位帖引太祖戒汪仲魯告  
歸不得輒通郡邑官長作祠堂帖引孔子鄉黨恂恂戒  
子弟不得橫取人財橫辱人箠楚以慢父母虐兄弟會  
郡守移建朱子祠為泉山書院延主教事魏璫竊柄屢  
欲起喬遠以收人望不赴並與社中講論切磋躬行之

學戊辰己巳間鄭芝龍肆氛海上喬遠開誠約束欣然  
就撫李魁奇再叛獨言招我非何侍郎不可喬遠毅然  
親至中座慷慨諭以禍福弭耳不敢動收回巨艦利器  
當事因掃平之崇禎二年臺省交薦特起南京工部右  
侍郎具疏引年甚切屬有邊警慨然曰此豈臣子高卧  
時也立就道甫入都即上疏言敵盤踞內地須日夜撓  
亂之母以塘報為了事截殺為虛名請開鎮江之練湖  
以通運道懷宗嘉其老成體國署戶工二部署事二月



乃乞骸歸懷宗以清名慰留再力請乃許猶復上開海  
禁一疏入閩至建陽遍拜考亭諸儒祠墓崇化里有橫  
渠子孫在焉為書祠記以西銘一篇括盡仁體而要以  
完天所生為主無常變死生一以順受天命還稟天則  
發程朱之旨既抵家脩羅一峰書院於月之三八日與  
鄭孩如唐見梅韋衷芹黃季宥張玄中率諸門人集講  
曾撰講懲忿窒慾二解且言人於一歲之中循省善念  
幾多惡念幾多庶漸漸有遷善改過近裏著己之意語

樞切至常題一聯座右曰人心中無私便聖天理內行  
事最樂海內以喬遠與鄒南臯馮仲如趙鶴儕並稱崇  
禎四年卒年七十四喬遠終始四朝後先一節安貧樂  
道鞠躬厲行平生德容沖粹與人交洞見肺腑自少勵  
志前脩既立朝以文章氣節自砥里居多年益加意學  
問因人設教誘迪以躬行語默之常扁其齋曰寡過又  
曰自誓取古人誓墓之義命其堂曰耻躬每與許敬菴  
李見羅范晞陽洪桂渚諸公論學不分別門戶不支離

心性惟欲於庸德庸行中步步繩尺庶不負終歲讀書  
求友之意大學士葉文忠向高問林宗伯欲楫曰何穉  
孝何如人也答曰文章氣節人皆知之其深於道學人  
未必知也葉曰穉孝吾未嘗見其講學林曰惟不講學  
乃真道學耳因具述其平生得力惟自誓寡過不求人  
知文忠以是序閩書稱其平生篤學真脩無愧宋儒云  
所著有釋大學釋武城釋大誥召誥洛誥他纂述之作  
在刑曹有獄志在禮曹有膳志而大者輯明十三代遺

事為名山藏集一代賢士大夫所論著擇其雅馴兼收  
衆體為皇明文徵又纂閩書百五十卷自著詩文百餘  
卷有萬厯泰昌天啟崇禎等集壬申七月福建巡撫鄒  
維璉以大學士史繼偕等公舉理學名臣題請特祠祀  
于學宮之左隅贈工部尚書予諡後未得諡九年興泉道曾  
櫻為建理學名臣坊十六年賜祭葬子九雲見家學明史

行畧 家學 新郡志

宮贊鄭大白先生之鉉

鄭之鉉字道圭號大白晉江人博通經史天啟壬戌進士選庶常授簡討纂脩神宗實錄時魏璫竊柄之鉉浩然求去丁外艱哀毀幾殆居家五載於後彥多所獎進旋起授官贊冊封岷藩事竣念母馳歸至莆病卒按先生曾與何培所九雲林讓菴肩昌傳漢溪元初王何稱之驥黃石眉日昇黃東厓景昉同結社為文沒後東厓先生為撰行狀

新郡志

道志

湘隱堂自識

給事李元馭先生唱

李焜字元馭晉江人崇禎甲戌進士殿試二甲一名授禮部主事擢兵科給事中召對陳禦敵宜以守為戰平賊宜以剿為撫上首肯久之差封益藩還遷禮科督餉江西再往粵東至武林病卒

新郡志

給事傅漢溪先生元初

傅元初字子仁晉江人祖道唯鄉薦累官按察副使里居為李文節所重元初崇禎元年進士授浮梁令建議漕運折色民立祠祀之直指舉卓異入部會丁外艱服

除擢工科給事中條議屯政馬政及閩海利源悉軍國  
至計以劾南吏科為所中罷歸卒於家所著有尚書撮  
義四卷自跋云齋頭索居餘忠耿耿輒溫尚書舊聞參  
合經史要求真實經濟而訓詁經生之習愧未免焉林  
氏脩昌序曰吾郡襟江帶海扁舟上下可以溯洄然郡  
士大夫鮮有為此游具者漢溪傳子既卜其尊人宅兆  
於漢溪復以一葉作江上岫廬風朝月夕乘潮往來而  
省視焉余問舟中往來所讀何書漢溪曰吾幼從父祖

讀尚書開卷見放齊舉眉子為千古諂媚之祖驩兜薦  
共工為千古朋比之祖當時未設諫官知人之哲獨推  
聖帝然四岳舉舜未嘗論賞薦鯀不效未嘗議罪吾忝  
諫官每念二祖列宗用入行政之大克媿美於典謨因  
撮史合經名為撮義夫猶是幼從父祖所讀尚書也一  
日林子攜榼舟中與漢溪泛遊筍江浯溪溜埨諸勝訪  
曾子霖寰於法石曾似龍別號則撮義已成帙刊傳海內矣  
余既羨漢溪之思奇而才敏志孝而願忠顧竊歎以其



琅琅天球之章為坎坎河干之具因為朗誦說命三篇  
拜手颺言曰君家傳巖濟川作楫亦惟代言納誨啟沃  
乃心令撮義稱引古昔揚扆昭代闢邪陳義足為經筵  
啟沃之資當宁側席旁求吾子其以尚書進為恭默遜  
志稽古訓之一助巨川之濟有如此舟豈獨借岵廬於  
江上哉曾子曰善請書之為撮義序

按此序林氏荀堤集脫漏未刻

雍正間郡志 朱氏經義考

林維清先生如源

林如源字維清晉江人五歲而孤七歲而通文史年二十餘舉有司不遇築室於其所居馬鞍山之旁名堂曰五因蓋因山因水因樹因石因其先人故所遊盤之跡結而隱焉讀書其中老至不知遍借書籍於人錄其佳話分為四科人倫庶物靡不攬載惟所常目則罷抽揚星霜七更藁楮四易命其兒夢叶夢甲夢斗手書之而名之曰五因閒抄又有綱目集要史評八閩名山志撮名志何司徒佳話順治戊子年卒年七十三子四二為

名諸生有名於時季曰麟禎

比部林先生竒襟

林竒襟字未詳按鏡山先生撰竒襟父東井林公太毓墓誌云林氏之世有太平守鉞賢士大夫也與呂涇野顧東橋屠赤水張甬川同時而與之游好子太毓受業里中先輩李白齋公及吾先子怍菴公卒年僅四十有四太宜人黃氏督比部兄弟讀書兼晨夜比部歌鹿鳴守澧州太宜人八十四矣愀然曰爾第為余作五斗耶

家人自澧還問政廉平乎無他及三載秩滿丁蔡母憂  
於亥補東牟得贈公為奉直大夫而黃太宜人封母也  
此時太宜人九十又一比部君居比部事實未詳其受  
業鏡山先生見萬厯集校刻門人今錄出待考

何司徒  
撰林太

毓墓志

御史徐奕開先生縉芳

徐縉芳字奕開晉江人榮之孫萬厯辛丑進士

李德御先生登卿

李登卿字德御從鏡山先生受業黃氏季淑云吾黨中不可一日無德御

黃鳴晉先生

黃鳴晉名未詳從鏡山先生受業與修閩書

黃麗甫先生

黃麗甫名未詳林氏素菴曰鏡山高弟黃麗甫蚤以毛詩登壇蓋鏡山早歲得鄭道圭而詩名益顯晚得黃麗甫而詩情益豪抑麗甫先世竹溪肖竹二公文章德業

為世所宗家有衣鉢又不徒學鏡山者矣餘事實未詳  
荀堤集

郭先生望奎

郭望奎晉江石湖里人祖孝義先生始遷郡城中孝義  
先生名尚謙以至孝文學名見志乘望奎為諸生楚楚  
者嘗受學於鏡山先生餘未詳待考核焉

何公撰孝義  
先生傳後

縣令潘士雅先生藻

潘藻字士雅以明經任寧德訓導處諸生如朋友切磋

共之士皆樂從遷廣東長樂知縣視民疾苦如其自身  
不取民一錢也以其兄瀾任廣憲迴避改官歸卒平生  
錚錚志古人臨沒猶與予談曾氏之學請與必有正是  
托孤寄命之根其卓見如此 何司徒文集

宗伯林平菴先生欲輯學派

按先生撰鏡山何公志狀云某從壬寅歲以文字受  
知鏡山遂托門牆考德問業溯吾鄉彼時英髦陶鑄  
鏡山之門者為多也厥後先生歷官清要物望歸然

於後輩亦多所獎進如吾宗餘隱先生光龍其一也  
再考先生館甥張確菴潛夫疑在及門之列今并附  
之其餘待考先生著述今存者易勺一書

國朝督學汪公薇及諸前輩序言表章備矣獨友清堂  
文集未見馥從乾隆丁丑寓郡齋託友人從先生家  
購覓無得先生舊里在郡之南鄉其族裔太常林氏  
洪烈為吾先公辛未所得士因是訪先生的系近頗  
式微而篇籍亦荒渺莫問可勝嘆哉謹識之尚有待




訪求云己卯四月望前二日書於雲津山館

宗伯林平菴先生欲楫

林欲楫字任濟號平菴晉江人萬厯癸卯鄉薦第一三十五年成進士選庶吉士授編修假歸起充廷試掌卷官使封並藩還掌起居注戊午典浙試假歸泰昌初起左中允天啟元年轉右諭德陞右庶子擢少詹事晉禮部右侍郎六年遷南吏部懷宗立陞禮部尚書掌詹事朝議誅毛文龍力言不可與閣忤假歸三載召脩實錄

甲戌充殿試讀卷官教習館員引疾去戊寅起掌部職  
楊相嗣昌議增兵餉欲楫力言三空四盡之秋以窮民  
養驕兵未見其利復具民窮兵荒疏力指時弊不報差  
視鍾山陵寢還至天津連疏以疾乞休歸卒於家所著  
有易句老子句日記友清堂集

雍正年間郡志



閩中理學淵源考卷七十五

欽定四庫全書

史部

閩中理學淵源考卷

七十六至  
八十三

詳校官編修<sub>臣</sub>謝振定

刑部郎中<sub>臣</sub>許兆椿覆勘

總校官原任中允<sub>臣</sub>王燕緒

校對官中書<sub>臣</sub>王鍾泰

謄錄監生<sub>臣</sub>張鱗

欽定四庫全書

閩中理學淵源考卷七十六

廣平府知府李清馥撰

郡西林氏家世學派

郡西林氏家學舊矣何司徒為林坦齋先生傳曰有  
泉先輩之威士專一經者弟子聚而師之楷其模範  
而守其訓誥終身無所改徙以故師名其家士名其  
學文獻之盛所由來也蓋自成化以後蔡虛齋修明

易學士得聆其緒論轉相授受其傳浸廣林先生受  
易於郭公文博其一也又曰先生所說書已焚草今  
不傳矣乃質行不愧忤於俯仰廣文與志唯君繼述  
有道之盛皆先生開之夫立德君子烏在尚言耶茲  
錄其家學著于篇再素菴先生稱省菴為伯祖未知  
族派之詳姑附待考

文學林坦齋先生文明

林文明別字坦齋少受易於郭文博而文博受易於蔡

大莊公虛齋文明褒衣博帶與諸弟子雍容講說陳  
紫峯先生與之相重統會聖真窮討理窟旁及詩文  
靡不闡究弱冠為諸生教人反復諄切句析條分悉  
盡其誠而規矩嚴密無所假借閱史籍見忠臣孝子  
貞夫義婦遺事輒掩卷垂涕得一善言隨筆劄記為  
人講論不暢不休以此得宗仰諸生間幹質魁梧與  
之處油油若無阜白至是非義利蘄然辨毫髮事父  
母切至孝敬不違伏臘祭祀洒掃焚香終老忘倦邑

中饑疫流行家無宿食量力推賑於親友往來恤問  
亡少却避鄉有不平得一言而退其篤行如此所講  
四書易經故有草說皆手自訂定及見紫峰淺說通  
典曰足以傳矣吾不能有加也臨沒取而焚之草說  
遂廢子敦忠孫學魯

教授林錦山先生敦忠

林敦忠字恕甫晉江人生稟至性母陳氏蚤歿權厝叢  
間每朔旦輒省視哀哭如成人長為諸生步趨舉止折



矩準繩同業生望見輒目為有道先生敦忠生平論學  
一以躬行為主督學奉新蔡公國珍嘗集諸生講學于  
清源山中諸生羣有問難敦忠拱手徐前曰今之學者  
基無尋尺而臨深為高自謂聖賢作用不知中行難得  
若狂若狷須求一箇入頭狂者天資洒落地位儘高若  
狷者痛自刮磨掃却枝葉從本源著力亦自覺有洒落  
處此狷之可幾於狂也所謂踏實地人也蔡稱善者久  
之其論學如此應歲貢授南陵司訓已遷諭海澄教授

興化所至皆立模楷諸生翕然敬信接人恂恂一團和氣而於義利之關斬如海澄為生祠南陵莆陽伐石紀德歿後三庠並祀名宦泉祀鄉賢子學曾別見學閔并  
孫維暹俱見科目志黃文簡銘其墓曰德行恂恂召伯  
春居今行古任定祖史氏傳之標儒林寥寥千古公為  
伍 舊郡志 墓志

司徒林省菴先生學曾學派

林素菴曰吾郡自蔡文莊而後行脩學富必推黃菴

肅光風清塵絕必推李文節九至若居官居鄉如寒

我

潭秋月心嚴為師老而不倦則吾伯祖省菴先生一人而已馥按明自隆萬以後異說蠱起公之學雖兼尚餘姚然其教授生徒獨稟朱子小學教人成法步趨不失年耄不衰其維持風氣造就髦士之功偉矣於時會龐雜之日能獨守典型於不墜亦一時砥柱中流也

司徒林省菴先生學曾

林學曾字志唯號省菴晉江人萬曆二十年進士授南  
康司李擢為吏部郎周歷四司疏陳東南水患乞遇災  
思倣亟簡賢才共濟時艱尋引疾歸甲寅起為太常少  
卿天啟中累官戶部尚書致仕歸問業者屢滿閩省直  
指使者張巡撫熊特疏于朝略云林某孔孟真詮周朱  
正派不愧理學名儒年踰八十猶朝夕講誦不輟學者  
羣然宗之比之蔡文莊而其厚德雅量殆類先代文潞  
公韓魏公之為人宜特加優禮恩錫部覆奉旨命有司

遵照存問闕自司馬林文安漸至學曾百二十年僅  
再見焉崇禎甲戌年卒年八十八學曾孝友天植學  
業庭授盖方髫齡已下為有道氣象生平自誓一字  
不輕出一錢不輕入歷官所任皆以趙清獻一像自  
隨苞苴請託望風遠却聞神宗時每呼曰林秀才其  
以清白受知如此居恒與李文節相嚮慕文節被攻  
時人勸避之學曾恬然如故嘗語人曰吾鄉不可一  
日無文節使少年後進有所敬憚宦三十餘載未嘗

一刺投有司雖至親不少假借室僅蔽風雨門可羅  
雀兒童走卒咸知有林夫子年逾七十猶燃夜讀書  
或達旦不寐終日危坐未嘗跛倚逢人循循善誘開  
陳懇至曠若發蒙焉所著有史評警語潔身亭說皆  
論學正派又有孝經詮解批點小學編諸書

新郡志  
通志

林氏筍堤集跋語

銓部林素菴先生孕昌學派

按素菴先生為吾郡明季舊獻視鏡山何公為前輩

與石齋黃公八公蔣公為同年友榕檀問答公為之序皆同時互相觀摩講切其學本之伯氏省菴司徒考省菴與公皆談姚江之學然省菴自授徒至耄年奉朱子小學書為高曾矩矱絕無肖似王學者素菴則平生景慕文清文成文莊三先生纂輯三公遺書不但誦說其文而已是時閩中典型師友猶有可稽如莆有金石社漳有榕檀吾泉鏡山何公倡學於恥躬社省菴林公講說於不二精舍布衣季歲黃公栖

隱於昇文社而素菴則讀書於筍江在茲社嘗自撰  
在茲社序曰筍江在茲山房余小子所草構耕隱鳩  
子弟讀書其中者也每慨末俗虛名焦心正學不講  
有言及身心性命之故者輒指之為迂詆之為偽而  
後生新進粗知章句便膾炙李禿翁之書言以翻案  
為竒行以跼蹠為高釀成輕薄漸為世道之憂思一  
起而維之顧余非其人也觀素菴自叙結社之志可  
見彼時俗波靡公蓋維持于不墜者爾又公嘗集子



弟月三會講說經義旁及史學其門人張拱宸何承都等緝成名曰經史耨義又著周易解義荀堤集諸書著作甚夥今考其門徒姓氏著于編

銓部林素菴先生孕昌

林孕昌字為磐號素菴晉江人祖雲龍隆慶丁卯舉人官至運同晚好讀易手評二程及易傳時與布衣黃季崧論學必依程朱虛齋正派年九十終為諸生時即志濂洛關閩之學天啟二年進士歷官吏部文選司郎中

其秉銓衡澄叙官方疏卹直節薦揚理學諸名臣後以避璫黨忤權貴借他事下詔獄百日歸家立朝僅兩歲已而三徵不出里居講學從游者屨滿所著有易史象解廣占續小學春秋易義泉山小志經史釋義旦氣箴語錄在茲會語笥提集未梓者有論語釋義尚書三禮三百篇藁前後戊己自鏡錄雁山集等書

童氏子焯撰春秋易義序

新郡志

林素菴先生問問錄節鈔

問問錄小引

學之需問久矣言博學者繼以審問舜大智也而曰  
好問今人迺有學而無問矣夫子以好學下問稱孔  
文子風世也非為文子也學不講是吾憂問弗知又  
烏能措乎中州張得一先生來按吾閩慨然以倡學  
明道為己任巡方事竣則偕參知魯二雲先生進筭  
江社諸友於羅一峰先生書院而提誨之已復出上  
問錄三十則見示若謂滿目皆上也何處是下愚拜

受讀之不覺起舞曰有是哉學問兩字復明於今日也夫皇華之詩諏謀度詢皆問也乃察吏安民而外更為崇儒橫經之舉則斯問也不獨振風紀且勵風化矣愚不敏承問宜有所答而慚未能因杼管見而再申問焉遂名之曰問問錄尚冀有道君子之再有以教予也

問未發之中解說猶易尋認甚難不認得如何執得此探本窮源之論也愚謂未發非屬玄虛人身實實有箇

中體如花之有根如水之有源雖發矣而有未發者存焉雖不發矣而有能發者存焉所謂天命之性無極而太極天地之大本是也人身實實有箇太極却被私欲蔽錮憧憧勞擾未發之中從何識認惟日夜所息至平旦之候一夢甫終衆緣未乘天地清寧之氣來與我接此時良知好烟烟不昧已隱具發而中節體段矣在天為平旦在人為未發此孟夫子旦氣二字程子謂其大有功於後學也李延平教人靜中觀未發氣象夫靜

則孰有靜於平且者從此尋認從此下手用戒慎恐懼工夫使一日之間無非且氣之流行推之應事接物隨處提醒隨處迫現則不獨靜可觀未發動亦可觀未發矣不知可備葑採否

問致知格物格字即有恥且格之格當化字看此論極是夫格致之說紛紛莫定久矣愚謂當先繹大學本文明明德於天下至先致其知工夫已盡乃不曰先格其物而曰在格物實無所用工夫矣蓋知即明體如日月

當空明鏡在懸著不得一物無論惡物著不得即善物亦著不得也格字即格君心之格人終日為物所障故知體不現物格而知有致猶塵去而鏡自空也看來格去與格化與陽明格不正以歸於正意似相合不審有當否

問子何以孝臣何以忠俱莫為莫致之光景便是天命之性此解最為妙悟人但知子臣弟友為庸言庸行故日用習而不察不知其所以然處皆天也靜思默想何

等奇妙即如人終日目視耳聽手持足行習為固然亦安知為天所命迨觀盲聾者之無以與於視聽痿痺者之無以與於持行然後知天之錫我者奇而厚我者至也子思子將天命說入庸德使人不苦玄虛復將庸德歸到天載使人不厭平易

問吾輩下工夫一味枯靜終無著落愚見亦是如此程子曰不哭底孩兒誰抱不得虛齋先生云若是真學問文章須見於威儀之際與夫日用之常若是真道德性



命須見於治家之法與夫當官之政不則閉門靜坐亦  
虛耳然先輩每教人靜坐想為脚跟未定者先下一砑  
此法亦可細參否

問忠恕是仁字脈絡歸仁見一貫光景何以知之曰即  
以克己兩字知之也夫忠為中心恕以如心此己不克  
則一團窒礙到處荆棘己心不能如人心人心不能如  
己心仁從何歸一從何貫乎愚嘗謂一字堯舜以來相  
傳之意而貫字為聖門獨標之宗一以貫三字內實實

有克己工夫故告淵以克己而授參賜以一貫其道一也然否

問愛之一途未足盡仁仁性體也發而為愛則情也仁體不可見惟惻隱為仁之端故以愛字歸之要亦有不拘拘於愛者舜舉十六族而誅四凶何其愛十六族而不愛四凶耶總以行吾仁而已此說可相證否

問夫子處處言仁却不曾露出仁字抑夫子與諸賢言仁者屢矣乃以為罕言仁何也夫子所言非求仁之工

夫則為仁之作用若仁體渾淪實口角形容不出只可靜參默會耳然否

問讀書須句句收合自家身上此是讀書要法人身自具有太極具有儀象具有始復兩卦但非讀書窮理亦體驗不出如周子著太極之書邈之無極而其用工夫處只定之以中正仁義而主靜張子西銘本於乾父坤母而其用工夫處則以不媿屋漏為無忝存心養性為匪懈邵伯溫謂乾坤為大父母故能生八卦始復為小

父母故能生六十四卦然復之中行始之舍章皆隱隱示人以處身處世之法此數者收合自家身上即他書不讀亦可矣如何如何

問惟怒難忍惟過難覺此兩語聖賢學脈也顏子亞聖得力處惟不遷怒不貳過忍則能不遷覺則能不貳矣薛文清嘗言二十年治一怒字尚不能消磨王汝止曰心有所向便是欲有所見便是妄如此用功檢點庶幾無過然否

童先生子煒

童子煒林氏素菴門人其序素菴春秋易義畧曰煒方  
髫齡即炙先生之教受知特深日與彙翁世兄同硯席  
親承提命立雪春風者數十載茲復與彙翁同宦一方  
適易義一書正在剞劂煒因得効校讐之役聊述生平  
有得於易義之旨以誌授受淵源之有自如此

童氏撰  
林素菴

春秋易義序

王氏家世學派

按郡先輩楊氏興撰彥衡王公銓神道碑稱王氏之  
門世篤忠貞家全孝友今考公在靖難時奮身殉節  
其孫桓庠生早逝妻李氏為吾六世祖樸菴公之女  
誓守節教督其子是為東軒公燻其媵洪氏不字從  
李氏老世號雙節顧新山先生諸公撰志傳詳矣東  
軒首以儒學顯著其子居南公文昇孫三揆公鏞漢  
冶公鏐皆以理學稱東軒居南又以雙孝著同郡先  
正王公用汲何公鏡山許公宗鑑並媿媿作傳述之

厥後孫曾其為寧粵軍門贈東軒居南為安東伯考  
其家世累葉濟美自遜國迄季明與國咸休無極此  
可以觀德矣茲著其家學纂錄前輩所紀述者著于

編

司訓王東軒先生熺

王熺字仕顯號東軒曾祖銓靖難時以忠節著父桓郡  
庠生早逝母李氏安溪旌義李公森之女矢志守節督  
教其子讀書其媵洪氏不字以從李氏老世號雙節熺

資稟聰穎博學多識事其母以孝聞父墓患水瘠哀哭  
幾絕改葬焉追服斬衰蔬粥廬墓母死毀瘠治葬復廬  
墓三年正德十三年以貢授廣東瀧水訓導瀧水僻陋  
士鮮知學首以明倫敬身為教以經義啟迪之俗尚鬼  
信襍熺刪定家禮教之任官五載乞休歸恒言稱母訓  
母好施熺雖貧每新穀升必播精遺四鄰忌日必哀其  
生辰雖年七十不敢受子弟上壽禮如忌日肇慶郡志  
載名宦顧新山先生志其墓子文昇亦以孝稱

顧新山  
先生撰



墓志 何鏡山先生撰王先生父子傳

王居南先生文昇

王文昇字子騰號居南熺之季子也凝定有至性自少即不為凡兒嬉戲十三歲隨父司鐸於廣父患疾祈以身代躬湯藥少愈乞休歸途疾轉劇值寇警旅寓郭外又有水患文昇竭力護持設床褥卧父床離水僅尺許文昇立侍水中三日父疾愈亦無恙洎父歿毀瘠致哀如禮嫡母陶繼母李事之盡歡生母鄭

疾思荔非其時迨荔熟而母逝則終身弗食焉公於  
祀事虔甚潔脩思慕潛然涕出感母鄭獨子之言中  
年議納妾初捐金納一女同安人既至詢已許人蓋  
儒生也昇不敢近並物色儒生歸之不責原金其重  
義如此生平勤學強識動遵矩矱不愧衾影談吐必  
稱古人性粹莊重口不出暴戾媒狎之言每誚兒  
輩仕無崇卑毋以墨敗法課子雖以舉子業而視世  
之繁華靡競口習行違者弗善也嘗戒子遺言曰吾

泉前輩林龍峰近輩王岵齋此二先生者人皆謂之  
樸實頭學者正當樸實上用工夫做到精微細密地  
位便是真正聖賢大抵人品好者都樸實不好者都  
不樸實好人又有幾樣者全看他學問如何耳昇之  
著述可撫入性理者甚多許公宗鑑王公用汲並為  
撰志傳子鏞鏗皆以實行理學著聲後以曾孫某貴  
贈安東伯

許公宗鑑撰本傳

王公用汲撰墓志

### 孝廉王三揆先生鏞

王鏞字庚鑄號三揆旌孝文昇子幼醇謹長有志聖賢之學覃精會思手筆識之萬曆十六年舉于鄉七上春官不第無意世途抱遺經以終老歲丁未下第歸遊山東卒濟南逆旅舍家僮圖輕裝取所著書焚之喪至其弟鏗驚問其故大慟而椽家篋中者次之

今見鏡山所撰傳中附載數十條鏞自少知孝五歲請父取筆作書

即書老萊子孝奉二親七大字執父喪每餐二合米數葉菜合煮之陳布衣欲潤題其齋曰今世誰有如

王庚鑄行古人道執父喪蔬粥三年未嘗一啟齒笑  
庚鑄真孝子矣鏞沉靜堅忍渾厚洪深得失不分喜  
怒不形其言訥訥其貌迂迂而大義所在必為必止  
賁育不能奪也趙撫軍欲求賢師以囑觀察觀察求  
得鏞而鏞已先受聘甘廣文所固辭卻之廣文曰此  
吾上官足下奈何重名義慢吾上官而使見怪我乎  
不得已往館三年未嘗以一事干其梗節大槩類此  
所著有天彝淑世編及語錄諸書先輩何鏡山先生

撰本傳其言曰吾泉理學之盛自蔡文莊陳布衣而後興起者僅僅其當吾身所見者三人焉布衣陳欲潤諸生林甫任孝廉王鏞云後以孫某貴贈安東伯何鏡山先生撰本傳

明經王漢冶先生鶚

王鶚字淑甫號元液天性孝友少慧穎居南公一言即服之終身竭力養志幾微周悉父歿毀瘠骨立喪祭如禮與兄鏞事嫡母曲盡孝敬事生母雖孝然終嫡母世不

敢與齒事兄稟命步趨惟謹歲藉教授弟子明晤自給  
操持極嚴介平生志學以居敬窮理為務讀古人書卷  
不去手雖終老明經而實以斯文正脈為己任言動不  
苟後學負笈相踵自癸巳受學李見羅徐匡嶽潛心著  
述有四書五焚存稿易經七削存稿詩經三百大意及  
時習諸說等書與林省菴諸公同脩府志一時名士如  
鄭孩如李衷一何匪莪諸公並稱許以為後學楷式設  
教江右勉諸生實行與廣文孝廉涂世葉門人吳文盛

講論不輟獨坐一室不夜分不寐卒之前一日猶以吾  
未見剛章未脫藁命姪燦記之學者稱為漢冶先生

林省

菴先生撰本傳

安海黃氏家世學派

馥按黃氏之先自正德間通判公為陽春令其仁澤  
流徽數世矣毅菴尊人菊山公又以詩古文辭名與莊公一  
俊王公遵巖相善王公獨稱其詩與駢語為長平昔庭訓皆  
根本禮教故毅菴立朝清節屏斥中涓書牘出處本末毅然



有執猶足窺其家學大端也茲錄其家世大畧著於篇首

同知黃菊山先生伯善

黃伯善字未詳號菊山晉江人以詩賦古文詞名與莊  
一俊王道思二公相善王公獨稱其詩與駢語為長庭  
訓根本禮教不及屛積嘗言曰吾行不能矯俗但自信  
無一橫錢又曰吾未敢即謂君子然不敢為小人此足  
窺行已大端矣所著有菊山文集十卷菊山詩集二十  
卷讀書彙記八卷連枝集十卷詞賦雜體四卷藏于家

子憲清孫汝良

同知黃以憲先生憲清

黃憲清字以憲晉江人嘉靖甲子舉人隆慶初知陽春縣縣屬萬山中亡命窟穴桴鼓數起官皆挾兵自衛憲清一意撫循嘗奉詔清覈民田盤冊槁楯跋履皆徧所至茹糗席蓐不以供應煩民五閱月而田之溢於舊額者幾倍然惟按舊籍纔足而止歲賦十二三民大使之立石著為令復革奏籍例金遷廉州同知珠海故多盜

設有戈船守兵墨者縱兵入海詭云游徼而陰與為市  
憲清無寇輒出者罪之再攝雷廉守篆並以節愛稱丁  
外艱歸卒子汝良

宗伯黃毅菴先生汝良

黃汝良字名起號毅菴晉江人萬曆十四年進士選庶  
常授編脩纂脩國史使趙藩王簡踞欲殿外安節汝良  
堅執入殿中禮畢即行餽贈一無所受轉南司業復移  
北有監生為巨璫私人偃蹇無狀欲按之挾巨璫書至

汝良曰國學四方觀瞻且司成無與中涓通書例如法  
責懲擢東官日講官每敷引古今隨事披陳東官喜動  
顏色進大司成天啟初轉南禮部侍郎乞歸乙丑起禮  
部尚書掌詹事崇禎初逆奸既殄首疏抗言楊左諸臣  
宜加封卹要典一編亟宜焚毀奏入陛見陳時務八要  
遂致政歸著有樂律志冰署筆談野紀朦搜河干集字  
慶華崇禎舉人孫光祉康熙補科舉人署甌寧教諭

雍正

九年郡志蒙



閩中理學淵源考卷七十六